

明

史

明史卷二十五

本紀二十五

莊烈皇帝三

十一年春正月乙丑朔以任丘清苑涑水遷安大城定興通州諸印官貪縱俱逮訊之中官所訶也因責撫按不先劾難辭溺職之罪命部院通行嚴飭自此地方官爭以諂悅中官爲事丙寅黃士俊致仕戊寅給事中傅元初請開福建海禁通市佐餉詔議行之癸未以玩寇逮王維章及總兵官侯良柱戊子裁南京冗官癸巳免漢中歷年逋賦仍賑之二月乙未朔洪承疇扼賊于梓潼大敗之總兵官曹變蛟追至茂

州斬賊無算擒其魁二十人李自成逃于洮岷遂投西番變蛟深入西番索之自成乘天霧率數百騎從深山中潛遁伏終南月餘復自陽平入廣元變蛟兵亦至偵賊藏山巔奮登盡戮之惟自成與田見秀谷英張能等十七人裂衣爲索縋崖逃去至鄖陽掠竹山杆子手結小隊而軍丙申城廬溝名曰拱極其南門曰順治北門曰永昌庚子日上有似日而小者色赤白午後化黑暈覆日久之摩盪日下而散賊陷瀘溪癸卯河南巡按張任學疏詆諸武臣不足恃盛稱文吏多奇才足以禦賊詔改爲都督僉事鎮守河南

總兵官甲辰鄭三俊以輕出人罪下獄尋釋之甲寅
李自成乞兵于羅汝才得衆數千復出掠閩鄉三月
戊辰我

大清兵攻宣府膳房堡戊寅賀逢聖致仕乙酉田惟嘉
以受賄劾免是月熒惑在大火徘徊氏房之間夏四
月甲申貶洪承疇爲侍郎左光先曹變蛟等並奪五
級限五月盡賊辛丑張獻忠僞降于穀城給事中沈
希培力爭不聽甲辰以劉之鳳爲刑部尚書乙巳御
經筵畢召六卿問邊事楊嗣昌奏孟子曰善戰者服
上刑此語殊足深惕嗣昌欲議和故借之以窺上意

也帝曰此昔賢爲列國兵爭言之今大司馬彰九伐之法奈何欲出漢人下策乎休矣卿弗復言戊申張至發致仕己酉熒惑逆行至秋乃滅帝素服減膳諭諸臣修省特旨處訪冊濫圍者姜逢元及侍郎王業浩科道傅元初孫晉等閒住降調有差五月癸亥朔盧象昇丁憂監視中官陳賁奏留之內寅以商周祚爲吏部尚書乙巳楊嗣昌假星變陳言以伸己說都給事中何楷劾之癸酉允盧象昇終制丙戌定高牆罪宗五年一審例又暑月在京繫囚殊死以下許釋候發遣六月癸巳安民殿災傷斃萬餘人武庫藏械

幾盡起守制陳新甲爲兵部侍郎總督宣大丁酉試御史林蘭友劾楊嗣昌奪情掌樞束手無策專主和議負國之罪非輕忤旨謫外任乙巳以程國祥楊嗣昌蔡國用爲禮部尚書方逢年范復粹爲禮部左侍郎並兼東閣大學士入閣辦事嗣昌仍掌兵部丙辰進盧象昇兵部尚書仍總督候代南北直隸山東河南俱大旱蝗庚申我

大清兵屯大青山遣使議和遼東巡撫方一藻疏請許之楊嗣昌陰主其說盧象昇抗言不可帝頗然之秋七月乙丑何楷劾楊嗣昌吉服入閣蔑禮忘親帝責

其苛論戊辰黃道周連疏劾嗣昌新甲奪情及方一藻和議之誤己巳召文武大臣于平臺並引道周入帝以道周具疏適當枚卜之後意有所爲道周奏辨與嗣昌爭論帝前過激帝責其恣肆叱令直廬候旨因諭諸臣共修職業毋以黨同伐異爲事壬申趣錦衣衛丞上鄭鄮獄以道周疏救故也甲戌修撰劉同升編修趙士春各疏救道周劾嗣昌戊寅何楷林蘭友並申救道周得旨道周降六級同升士春蘭友並降謫有差庚辰以李待問爲戶部尚書八月壬辰洪承疇奏陝西賊勦撫畧盡優旨報聞丁酉安定門火

藥局災癸卯賊陷睢寧乙巳敕戒皇親周奎田弘遇
袁祐並以宣宗外戚事鑒賜諸戚里癸丑傅冠致仕
羅汝才會羣盜惠登相常國安賀一龍于陝州掠內
鄉浙川犯襄陽九月壬戌賊陷五河甲子熊文燦遣
副將龍在田擊賀一龍李萬慶于雙溝大破之丁丑
成勇劾楊嗣昌不終喪逮勇下獄庚辰楊嗣昌請兵
事賊情諸奏緊禁抄傳辛巳我

大清兵分道入西協牆子嶺中協青山口總兵官吳國
俊敗遁總督薊遼兵部侍郎吳阿衡死之我

大清合兩路兵薄豐潤遼東副總兵丁志祥竇濬等入

援夜戰不能遏我

大清兵遂南下癸未詔盧象昇率各路勤王兵入衛冬
十月辛卯京師戒嚴徵祖大壽兵赴援留巡撫方一
藻陳祖苞等分守遼薊甲申命盧象昇率總兵官楊
國柱虎大威兵嚮易州出其左檄天津青登萊之兵
出其右劉澤清以山東兵遏其前癸卯召文武大臣
及盧象昇于武英殿問方畧象昇意主戰與嗣昌議
不合嗣昌頗憾象昇帝亦心肯嗣昌也壬寅撤孫傳
庭洪承疇兵入援甲辰高起潛所部兵敗于盧溝橋
戊申命諸大臣分守都門御史郭景昌劾楊嗣昌無

膽無識徒工爲欺罔乞立正其誤國之罪不報戊午
洪承疇孫傳庭率諸將出關羅汝才以爲勦己也走
太和山乞降于中官李維政維政檄熊文燦受之十
一月辛酉京師九門閉癸亥我

大清兵自良鄉涿州趨河間丙寅編修楊廷麟劾楊嗣
昌主和之誤詔改兵部主事赴盧象昇營贊畫戊辰
我

大清兵入高陽前大學士孫承宗及其子尚寶丞鑰貢
士鈗等俱死之癸酉我

大清兵連破衡水武邑棗強鷄澤文安霸州阜城丁丑

留孫傳庭暫駐真定甲申括京城廢銅鑄錢乙酉我
大清兵自德州渡河嚮臨清分道趨高唐濟寧合于濟
南辛巳破威縣丙戌攻內丘羅汝才分屯所部于房
縣竹山鄆西均州與張獻忠遙爲聲援十二月辛卯
命劉宇亮督察各鎮援兵奪盧象昇尚書仍以侍郎
總督與高起潛戴罪立功壬辰我

大清兵入臨洺乙未商周祚以贍徇削籍丁酉我

大清兵破深州知州孫士英死之連破平鄉南河沙河
元氏贊皇臨城高邑獻縣庚子劉之胤讞獄不稱旨
帝欲逐之方逢年票擬從輕帝不懌逢年間住之鳳

遂削籍盧象昇孤軍轉鬪而南與我

大清兵戰于賈莊敗績死之丁未遣中官邊永清分守
薊鎮西協我

大清兵連破昌平寶坻平谷薊州景州趙州清河良鄉
乙卯入東昌丁巳破玉田諸生桑開基死之

十二年春正月庚申我

大清兵入濟南巡按御史宋學洙布政使張秉文督糧
副使鄧謙濟南道周之訓運使唐世熊知府苟好善
知縣韓承宣宋希堯李承芳張列宿黃建極俱死之
壬戌我

大清兵破青縣副總兵祖寬戰濟南城下敗績乙丑敘
緝奸功王之心曹化淳俱廢錦衣百戶世襲戊辰劉
宇亮孫傳庭會師十八萬自晉州嚮濟南祖大壽亦
自景州至相視莫敢前壬申以甄淑爲刑部尚書甲
戌我

大清兵自濟南破東平乙亥破莘縣復至濟南丙子破
內丘館陶丁丑進洪承疇兵部尚書總督薊遼我
大清兵破慶雲東光海豐庚辰破冠縣甲申至張秋破
汶上攻兗州安慶巡撫史可法移駐徐州備之丁亥
以莊欽鄰爲吏部尚書越五月不至罷之戊子我

大清兵趨天津二月壬辰鐫楊嗣昌高起潛孫傳庭級
免顏繼祖官逮總兵官倪寵下獄丙申劉宇亮削籍
戊戌我

大清兵奏凱東還己亥我

大清兵至青山口乙巳保定天鳴庚戌御史王聚奎劾
陳啓新緘默尸位帝不懌謫聚奎山西按察照磨壬
子命中官申之秀提督九門王允中守備承天甲寅
董羽宸署都察院事丙辰左良玉敗賊劉國能于許
州國能降賀一龍李萬慶東走合于馬進忠三月壬
戌我

大清兵趨豐潤丙寅至冷口戊辰我

大清兵盡出塞己巳逮陳祖苞顏繼祖俱下獄誅吳國
俊丁丑奪楊嗣昌官戴罪視事辛巳陳洪範擊賊于
南陽李公店敗績左良玉戰內鄉大敗之夏四月戊
子朔諭兵部彙崇禎七年以來條奏訓練儲備之法
刊布天下戊申程國祥致仕庚戌賊李萬慶率衆降
于左良玉丙辰郭景昌以濟南失事請正楊嗣昌罪
帝怒其挾私攻詆逮下獄戊戌代州浚京城濠五月丁
巳朔楊嗣昌奏失事六案失機者鄧希詔楊芳趙光
璧田祿劉文耀孫宗陷城者陳祖苞張其平李綦隆

趙之鼎頡三省張昌期王應元李芳塘雷之渤徐完
一劉銓翟運晉胡應瑞翰欵者尹亮陳相望郭士貞
楊綱陷藩者顏繼祖倪寵祖寬郭進道損將者李重
鎮劉銓縱敵者孫茂霖陳國威崔秉德韓文獻及秋
並棄市惟祖苞先期服毒死庚申嗣昌薦宣大總督
傅宗龍自代徵爲兵部尚書甲子進范復粹禮部尚
書以姚明恭張四知魏照乘並爲禮部尚書兼東閣
大學士入閣辦事乙丑張獻忠復叛于穀城攻陷房
縣羅汝才李自成五部並起應之壬申出內帑三十
萬金濟餉詔他日償之丁丑改申之秀守備天壽山

癸未遣給事中六人搜括南直浙江江西湖廣河南
山西錢糧充餉六月己丑敕運籌却敵功進薛國觀
蔡國用范復粹並太子太保戶部尚書姚明恭張四
知魏照乘及舊輔張至發孔貞運劉宇亮傅冠程國
祥方逢年各賜金幣楊嗣昌復原官中官曹化淳劉
元斌盧九德李承芳卞希孔王裕民王德化並廕錦
衣僉事世襲癸卯命中官趙本政總監真定保定涿
州昌平己酉楊嗣昌請于各鎮抽練精兵以爲勦賊
先驅從之練餉之加自此始秋七月戊午以中官張
榮提督九門辛酉王裕民總督京營壬戌督修曆法

光祿卿李天經上西洋湯若望坤輿格致書三卷詔
留之壬申左良玉討張獻忠于房縣敗績良玉以熊
文燦誤已疏其事于朝詔奪文燦官仍視事良玉戴
罪立功癸未以傅永淳爲左都御史孫傳庭詐爲失
聰不任職逮治之八月庚寅復以謝陞爲吏部尚書
庚戌磔鄭鄆于市壬子命楊嗣昌以原官兼兵部尚
書督師討賊賜尚方劍給帑金四萬蟒紵絹緋各五
百端九月丁卯宴嗣昌于平臺後殿帝手觴嗣昌三
爵製詩灑宸翰賜之己巳以王德化提督東廠甲戌
杜秩亨提督九門冬十月丙戌彗星見己丑停刑丙

申鳳陽地震丁酉中書沈廷揚疏陳膠萊海運之利
戊戌敘京師城守功進薛國觀范復粹少保吏部尚
書姚明恭張四知太子少保戶部尚書皆予廢揚嗣
昌賜金幣丙午拜左良玉爲平賊將軍嗣昌以所部
多降將可倚以辦賊故命之十一月甲寅朔逮熊文
燦辛巳從陳龍正之議郊始用辛十二月乙酉琉球
入貢是歲兩京河南山東山西旱饑命真人張應京
即京師禳之

十三年春正月癸亥申辨文武章服始取山海經異
獸爲中官品級之差其極品者天驥識者以異獸環

列爲大不祥之兆丁卯考察天下官吏下貪官姚永濟等三十七人于刑部獄治之夜東方黑氣彌空連三夕癸酉東廠獲入覲官賄籍詞連掌吏科阮震亨下獄論死丙子傅宗龍下獄以陳新甲爲兵部尚書宗龍入朝所陳奏頗拂帝意在本兵疏無一俞者未數月遂及閏正月乙酉發帑八千金賑真定饑甲午命沈廷揚試海運甲辰發帑六千金賑山東饑二月戊午左良玉大破張獻忠于太平縣之瑪瑙山獻忠精銳俱盡走歸州山中甲子賜楊嗣昌斗牛服給萬金備賞戊辰敘甘鎮功復洪承疇太保賜緋蟒進白

貽清兵部侍郎餘陞廢有差辛未羅汝才陷光州癸酉增祀北斗星于星辰壇丁丑諭殿試貢士先日較射戊寅以亢旱詔羣臣直陳利弊庚辰齋居親禱詔大小臣工痛加修省遣官告于南北郊社稷風雷諸壇三月丙戌大風霾丁亥我

大清兵至義州謀攻錦州洪承疇遣祖大壽吳三桂劉肇基屯松山待之撤馬科以山海關萬人同往戊子詔以各鎮兵馬錢糧器械內臣察飭已久稍爲改觀俱撤回京另用其戰守防援事宜督鎮撫道一意肩承各攄猷略以濟國難己丑以蘇松漕賦獨多勒限

○追比不及額者罪。庚寅以保舉換授多出資緣自今
赴部者并送國子監考驗同例貢選除不堪者罷之
丙申策試天下貢士賜魏藻德等三百人進士及第
出身有差。戊戌兩發帑三萬金賑畿南饑。丙午停徵
兩河崇禎十年以前逋賦。夏四月戊午江西巡撫解
學龍薦舉佐領及布政司都事黃道周。帝以道周黨
邪亂政學龍抗法庇之俱逮。至京廷杖下獄。己未浙
西大水。庚申詔撫按薦舉分治兵治餉才幹實跡失
舉者連坐。丙寅以吏部考選不列科貢命乙酉貢士
及歲貢廷試者于六部諸司及推官知縣通行察補

名曰特用不爲例丙子詔朝臣及撫按各舉將才己
卯改謝陞爲禮部尚書以陳演爲禮部侍郎並兼東
閣大學士入閣辦事五月辛巳朔羅汝才惠登相入
蜀監軍僉事萬元吉扼諸夔門癸未賊陷大昌犯夔
州四川總兵官鄭嘉棟湖廣副將張應元汪雲鳳會
陝西副將賀人龍李國奇共赴之斷賊爲二賊騎皆
陷淖不得馳大敗適石砬女將秦良玉入援邀擊于
馬家寨復敗之庚寅詔洪承疇出關督戰丙申直隸
山東山西河南陝西旱蝗大饑人相食草樹皆盡道
殍彌望命地方官設法賑濟招徠流移撫按躬行察

視即以饑徙之有無定屬吏之殿最召九卿科道于
平臺問制敵救荒安民三策通政使徐石麒所對稱
旨下部採行之以傅永淳爲吏部尚書丁酉寇陷羅
田戊戌吳三桂劉肇基等出杏山與我

大清兵遇三桂被圍肇基救出之失亡甚多己酉姚明
恭致仕截漕米萬石賑山東饑六月辛亥朔賀人龍
等三道逐賊大破之羅汝才狼狽走大寧戊午宣大
總督張福臻請沿邊屯田免科從之壬戌賊陷大竹
癸亥薛國觀擬諭忤旨召五府九卿廷議其罪給事中
袁愷因劾國觀罔上妬賢傅永淳及蔡奕璵葉有

聲等皆其私人詔國觀閒住永淳等俱免官乙丑進
謝陞太子太保戶部尚書庚午蔡國用卒己卯詔輯
武經七書大全秋七月庚辰朔直隸各省俱蝗命順
天府禳之仍募民掩捕卒己鄭嘉棟擊賊于觀音山
敗之張應元追至寶山又敗之賊首常國安降己丑
發帑二萬金賑順天保定災甄叔以受賄庇屬劾免
辛卯左良玉襲羅汝才于興山之半邊山大破之甲
午臨清副總兵黃胤恩上海運圖乙未袁愷復劾薛
國觀去國鞫重數百輛所受蔡奕璠葉有聲等賄賂
不貲詔下鎮撫司鞠訊丙申御史魏景琦劾范復粹

庸才不堪重任詔鐫景琦二級丁酉以李覺斯爲刑部尚書癸卯楊嗣昌再戰敗績具疏引罪詔發五萬金犒師八月辛亥以王道直爲左都御史己未戶部主事葉廷秀請寬黃道周忤旨廷杖除名庚申發倉粟賑河東饑賊首高守達率二百騎降辛酉進范復粹張四知少保兼吏部尚書壬戌官軍追惠登相至新寧西關大破之登相奔達州劉元斌以禁軍逐賊于霍山賊走陷麻城黃梅戊辰張應元率常國安高守達擊賊于袁壩驛大破之己巳應元兵次土地嶺爲賊所乘敗績庚午鄭嘉棟敗賊于開縣賊走大昌

萬元吉遣守備劉正國招羅汝才適賊魁王成功降于楊嗣昌汝才與成功有隙遂殺正國走巫山與張獻忠合丁丑進楊嗣昌太子太保惠登相降左良玉簡其銳卒自隸戊寅發帑三萬金賑真定山東河南饑九月己卯朔楊御蕃敗賊于鄆城壬午薛國觀削籍傅永淳及朱繼祚並坐免葉有聲下獄甲申楊嗣昌與左良玉扼李自成于巴西魚復諸山檄邵捷春駐大昌共截之時自成已饑困欲斃捷春擅移所戍兵自成遂逸入四川觀音巖盡殺所掠婦女以五千騎衝突而南嗣昌劾捷春疎防失事逮下獄論死丁

亥總兵官王紹禹敗賊于邗縣己丑揚嗣昌屯巫山
賊魁關索與其黨王光恩楊光甫並降初賊之入川
者凡九股至是惟羅汝才合于獻忠餘八股相繼歸
正嗣昌以聞敘賚文武將士有差庚寅命戶部覈屯
田實數辛卯詔災荒停刑其事關封疆及錢糧者限
五日具獄戊戌以李日宣爲吏部尚書癸卯詔明年
祈穀奉太祖高皇帝配增蘆洲課冬十月癸丑詔各
邊文武官聽督撫鎮量才題授吏兵二部覆用熊文
燦伏誅壬戌出帑萬金故棉衣二萬事給京師貧民
張獻忠陷劍州甲子賊趨廣元將自陽平關入漢中

總兵官趙光遠固守却之遂踰昭化趨西川丁卯濬
胡良河甲戌以河道淤塞逮前總河尚書周鼎治之
十一月壬午廢故輔張居正曾孫同厥爲中書舍人
壬辰監生徐仲吉疏救黃道周通政使施邦曜判其
尾云但可存此段議論耳寢之不奏仲吉再疏叅之
帝大怒並索前疏見邦曜所判削其籍下仲吉獄論
戊癸卯工部主事李振聲請限品官田廬之數章下
所司逮前刑部尚書甄淑下獄明年冬斃獄中丙午
河南巡撫李仙風敗河北賊于菜園十二月辛亥張
獻忠陷瀘州乙卯逮諱國觀丙子徵宣府總兵官楊

國柱大同王樸密雲唐通合曹變蛟白廣恩山海關
馬科遼東吳三桂王廷臣之兵共十萬俟來春大舉
洪承疇以餉爲言命戶部措足一年自天津海運給
之袁時中陷開州

十四年春正月丁丑朔以劉澤浚爲刑部尚書張獻
忠陷巴州己卯李自成陷永寧殺萬安王采鏗諸土
賊響應之遂陷宜陽杞人李巖令以所掠濟饑民其
衆日盛丙戌御經筵己丑總兵官猛如虎偕諸將追
張獻忠及于開縣叅將劉士傑先登連勝之獻忠以
銳賊繞谷中出其後士傑及遊擊郭關猛先捷戰死

如虎突圍出器仗軍符盡失壬辰元夕宴百官于建
極殿丁酉李自成陷河南府福王常洵遇害河南道
副使王胤長知府亢思檜及郡紳呂維祺死之壬寅
黃霧四塞日晡無光甲辰賊入川南薄成都楊嗣昌
趨廣安二月丁未賊去雒城分路向魯山汝州庚戌
張獻忠陷襄陽襄王翊銘及貴陽王常法等四十三
人並遇害兵備副使張克儉推官鄺曰廣死之賊掠
府眷及各官家屬發十萬金賑饑貽書李自成約共
攻開封辛亥諭各處撫按捕蝗壬子張獻忠陷樊城
尋陷當陽甲寅命中官陰象坤提督太和山丙辰法

司讞道周獄詞連編修黃文煥吏部主事陳天工中
書文震亨等俱下獄道周改鎮撫司戊午山東大旱
饑民父子相食徐德問千餘里白骨縱橫行人斷絕
李自成合羣盜攻開封巡按高名衡嬰城固守餉匱
周王恭枵出五十萬金佐之購死士間出擊賊斃賊
甚衆李仙風督諸將馳救兩日間三捷賊退數舍圍
解壬戌大寧河清進朱大典總督節制諸鎮討英山
霍山賊癸亥帝不豫詔赦天下停今年決囚乙丑張
獻忠陷光州己巳帝疾愈召內閣九卿科道于乾清
宮左室顧諸臣流涕曰歲饑盜熾竟至陷雒封戕親

叔朕之不德何以自逭不覺失聲諸臣引罪有以氣
數言者帝曰不然氣數亦須以人事救之三月丙子
朔楊嗣昌自四川還荊州聞襄王之變自經死帝以
嗣昌二載勤勞一朝盡瘁而兩藩罹禍郡邑破亡功
罪終不相掩下九卿科道勘議辛卯以雒陽陷逮李
仙風仙風亦自經死壬辰設裕國足民奇謀異勇二
科以求士之富國強兵者李自成陷歸德甲午給事
中左懋第劾故督師楊嗣昌虛恢欺飾所至以精兵
自衛在楚則徵巴蜀之精兵而獻賊得入川在川則
徵楚豫之精兵而闖賊得陷雒寧使藩封亡而身獨

存社稷危而身獨安雖戮屍不足謝天下帝不問丙申洪承疇會八鎮兵于寧遠辛丑我

大清兵自義州入塞祖大壽合諸鎮兵逆戰于錦州明日再戰我

大清旋師以誘之乙巳賊陷寧津夏四月丙午朔祠故都督劉綎于南昌辛亥刑部主事雷縉祚追論楊嗣昌失陷親藩等六罪不報壬子我

大清復進薄錦州副總兵那木氣都司桑永順以東關降二人故西部產也我

大清遂益兵攻錦州祖大壽拒戰仍復東關守之洪承

疇以援兵次于松杏甲子命丁啓睿爲兵部尚書督師賜上方劍節制陝西河南四川湖廣江北諸軍庚午張獻忠合羅汝才陷隨州知州徐世淳闔門死之賊屠州城是月召周延儒張至發賀逢聖入朝五月丁丑朱大典敗賊袁時中于蒙城庚辰范復粹致仕賊陷泌陽出傅宗龍于獄以兵部侍郎總督陝西三邊軍務仍戴罪丙戌設徐臨津通四鎮兵護漕以總河張國維督之壬辰以錦州被圍遣職方郎中張若麒詣洪承疇商度機宜癸卯賊陷信陽六月庚戌賀一龍等陷宿松英山乙卯陳新甲請分兵四路同時

侵

大清營洪承疇以兵分則力益弱議且戰且守帝頗然
之而新甲堅執前說張若麒亦謂錦圍可立解密疏
上聞新甲遂貽書承疇趣之癸酉兩京山東河南浙
江俱旱蝗賊勢益熾秋七月戊寅臨清運河涸庚辰
賀一龍陷潛山遂圍麻城丁亥睿赴援敗之賊解圍
遁丁亥京師大疫召賜張應京于會極門俾禳之辛
卯張獻忠陷鄆西庚子洪承疇誓師援錦州壬寅抵
松山我

大清兵屯乳峯山東承疇令諸軍登乳峯山西乙巳合

戰陽和總兵官楊國柱陣歿以副將李輔明攝之八月甲辰朔始分總漕督鳳之任以授史可法朱大典辛亥夜賜薛國觀自盡家貲入官我

大清攻乳峯山營諸軍力戰拒之壬子諸軍分兩路攻西石門王樸軍敗績丁巳再戰復敗績辛酉重建大學成帝親幸釋奠于先師孔子真人張應京請從許之我

大清以三千騎益圍錦州屯長嶺山甲子進攻松山掘濠深八尺困之洪承疇戒諸將各勵所部速戰以解錦圍諸將以餉乏請回寧遠就食其夕張若麒亦言

之於是議論蠱起之懷去志承疇方起送諸將王樸
遽先遁羣師從之昏黑中自相蹂踐號呼之聲震野
師乃大潰惟曹變蛟王廷臣得返松山承疇夜留兵
三之一嬰城固守命其二突圍求糧我

大清兵邀之尖山石灰窰松兵不能復還移屯海岸適
秋潮大上一軍盡歿得脫者止二百人若麒與贊畫
主事馬紹愉乘漁舟逃至寧遠劾承疇失策以自免
乙丑詔以宋周程張邵朱六子有功聖門當進稱先
賢位次聖門諸賢之下左丘明亦稱先賢許江北州
縣以麥充田租九月戊寅傅宗龍自新蔡渡河是日

李自成亦渡河趨汝寧伏兵以待己卯官軍遇之大敗庚辰宗龍以餘兵六千入陳州賊圍之城中之食辛己詔中官提督京營者亦稱總督甲申周延儒賀逢聖至仍入閣辦事辛卯傅宗龍以川兵出城搏戰敗績壬辰宗龍決圍趨項城被執不屈死之賊遂屠項城分兵屠商水扶溝封皇子慈炯爲定王丙申以關課侵牟命兩京九卿翰林科道及在外督撫巡按保舉清廉者任之得失同賞罰丁荅睿合左良玉兵大破張獻忠于信陽降數萬人得馬萬餘匹獻忠偕餘賊百人易衣而遁戊戌李自成羅汝才合兵陷葉

縣守將劉國能死之冬十月丁未陝西巡撫汪喬年發李自成先墓得抄斬之誓師趨河南戊辰復遣中官盧九德劉元斌率京營兵救河南元斌駐歸德四旬不進日縱軍淫掠十一月癸酉朔汪喬年至襄城士民迎入城死守李自成聞之解郟城圍來攻是日城陷喬年被執不屈及守將李萬慶俱死之自成深恨諸生剝削者百九十人丙子李自成乘勝陷南陽唐王遇害分守叅議艾毓初南陽知縣姚運熙總兵官猛如虎俱死之己卯禁朝臣私探內閣及通內臣於是待漏者俱露立不敢入直舍癸未進周

延儒少師辛卯遼東大雪丈餘十二月乙巳憫刑部
囚受凍令有保者皆釋之來年仲春始詣獄庚戌李
自成連陷洧川許州長葛通許鄆陵鄆陵知縣劉振
之死之庚申劉澤清大破李青山于石萊山甲子黃
道周解學龍徐仲吉並遣戍黃文煥等削籍戊辰停
內操惟大祀日提督忠勇營中官楊進朝仍以所部
防護張獻忠李自成羅汝才合攻開封七晝夜高名
衡及總兵官陳永福悉力拒之永福射中自成一目
自成退屯朱仙鎮蠲澤縣卒

明史卷二十六

本紀二十六

莊烈皇帝四

十五年春正月辛未朔朝賀畢命周延儒賀逢聖張
四知謝陞魏照乘陳演立御座西東嚮帝降座曰自
古帝王皆崇師道卿等即朕之師也敬于元旦端冕
而求繼自今訓誨匡贊調和變理俾宗社奠安惟諸
先生是賴遂西面揖之諸臣各愧謝癸酉偵知我
大清欲和帝以問輔臣謝陞對曰彼國肯和和亦可恃
陳新甲遂薦馬紹愉加職方郎中賜二品服密遣之
丙子山東賊平俘賊首李青山等獻闕下磔之丁丑

馬紹愉偕叅將李御蘭周維墉使于我

大清我

大清以無勅爲言紹愉馳請得之我

大清謂勅語殊不遜非誠于和者紹愉以聞辛巳李自成復圍開封穴城注藥攻之城堅不能入反擊所鑿土石殲賊數千騎丁啓睿左良玉又擊賊將劉宗敏李過于朱仙鎮大破之自成憤甚南屠陳州兵備副使關永傑知州侯君擢及州紳崔泌之王受爵等死之壬午召鄭三俊爲刑部尚書賊陷巢縣甲申李天經上壬午七政經緯新曆丁亥命浙江江西撫按禁

遇雜己丑耕籍田辛卯御史楊仁愿極言東廠比較
番役買事之害報聞二月丙午命周延儒清獄戊申
發帑二萬金賑山東亂民就撫者庚戌御經筵免各
直省崇禎十二年以前逋賦壬子李待問免以傅淑
訓爲戶部尚書癸丑起孫傳庭爲兵部侍郎總督陝
西三邊軍務以張福臻爲兵部尚書范志完爲兵部
左侍郎分督薊遼福臻駐薊州志完出關乙卯張獻
忠陷亳州丙寅賀一龍陷全椒三月庚午朔侯恂及
倪嘉慶戍邊辛未獻忠復陷舒城邑紳胡守恆死之
乙亥陷六安詔許罪人贖戍備賑丁丑魏照乘致仕

戊寅御中左門召考選諸臣問以禦寇籌餉之策丁亥松山裨將祖大樂夏成德縛洪承疇以城降于我大清總兵官曹變蛟王廷臣副總兵江翥饒勳等俱死之祖大壽在錦州圍中其部卒亦劫大壽降我

大清遂取杏山三城同時沒報至京師大震庚寅帝以寇氛不靖於南城建齋每日子刻同中官往誦佛經移時始還內給事中姜埰上言宗社安危非佛氏所能禍福且以九重之尊而親西竺梵文臣不敢以爲可御史廖惟義請驅道士羽士各還原籍禮部侍郎王錫衮亦請遣張應京歸俱不報辛卯李自成陷睢

州太康乘勝陷寧陵考城丙申陷彰德夏四月庚子
朔封皇子慈炤爲永王辛丑謝陞被劾削籍襄城之
役朝議疑賀人龍通賊乃密敕孫傳庭責而斬之賊
聞喜曰賀瘋子死取關中如拾芥矣癸卯周延儒請
以詞臣二人佐兵部從之著爲令甲辰免四川貢扇
三年丙申發帑三十萬金給關寧之師辛亥御史沈
向勅張若麒貪功喪師復逃寧遠宜正其罪報聞丁
啓睿楊文岳以左良玉虎大威楊德政等兵並集于
朱仙鎮良玉謂賊銳宜緩攻大威等不聽直前搏之
師大潰良玉母妻被執自成遂趨開封長圍困之己

未諭祭松山陣亡將士壬戌南御史米壽圖請斬張若麒以謝天下並陳練兵十害及秋若麒下獄論死癸亥詔曰中外諸臣折圭僭爵各有專司而乃任兵食之交窮忍邊腹之並困未有確然良畫奮起仔肩者自今其痛加猛省以副倚望戊辰我

大清兵破塔山馬紹愉以候朝命留園中

大清遣人衛出之五月甲戌賀一龍陷廬州丙子陷潁州叅將李桐敗賊于壽州戊寅周延儒納逆案阮大鍼之賄起馬士英爲兵部左侍郎總督鳳陽庚辰遣兵部司務朱濟賚教偕馬紹愉赴我

大清議和紹諭至塔山高臺堡以待不能得要領而還
癸未李自成發兵陷開州亳州丁亥王樸伏誅癸巳
副總兵李相敗左金王馬守應賀一龍等于潁州六
月庚子增直省解額壬寅發帑十五萬金及銀牌布
幣犒左良玉軍丙午詔趨孫傳庭出關殲賊戊申賀
逢聖致仕洪承疇從者至京奏承疇被執不屈死狀
帝爲臨奠揮涕賜祭九壇招蒐葬之不知其已降于
我

大清也己酉帝不豫辛亥免開封河南歸德汝州去年
逋賦癸丑張四知致仕諭各省直並停刑三年丁巳

御觀德殿試砲出召見枚卜諸臣于中極殿詢禦寇之策工部侍郎宋玫左副都御史房可壯大理卿張三謨奏對不稱旨戊午命蔣德璟及詹事黃景昉兵部侍郎吳姓並爲禮部尚書兼東閣大學士入閣辦事辛酉召廷臣于弘政門責吏部尚書李日宣掌吏科章正宸掌河南道張煊以會推閣員濫及宋玫房可壯張三謨之罪輔臣力爲救解不聽明日下六人于刑部獄日宣等戍邊玫可壯三謨並削籍甲子詔爲壇京師親祭近日死事文武大臣丁卯吏部彙奏知兵諸臣史可法李邦華范景文等二十人命俱引

見戊辰御史吳履中言今日之亂皆溫體仁楊嗣昌
二人所爲當暴其罪于天下以收人心不報秋七月
辛未敕山東勦寇功進周廷儒少師陳演太子少保
戶部尚書甲戌賀一龍毀廬州城辛巳開封告急寧
武總兵官許定國赴救兵潰于懷慶詔孫傳庭以秦
師出右保督侯恂以晉師出左亟援之中官齊本正
提督東廠王承恩提督勇衛營癸未皇貴妃田氏薨
輟朝三日乙酉諭有司衝鋒死守當與失陷殞身者
分別恤之丙申召鄭三俊爲吏部尚書丁酉下陳新
甲于獄八月庚戌安慶兵變殺都指揮徐良憲巡撫

徐世廕自南京馳諭之斬爲首七人而止楊德政伏
誅壬子詔停宗室換授張獻忠陷六安癸丑以范景
文爲刑部尚書劉宗周爲左都御史甲寅詔實修屯
田之政發御前十萬金收貯穀種並專設屯官丁巳
建直房于文昭閣左右令輔臣及詞臣輪直以便召
對癸亥蠲濟南兗州東昌諸處歷年逋賦乙丑赦黃
道周復以爲少詹事丁卯陳啓新匿喪被劾下撫按
訊之丁啓睿兵潰而逃逮下獄楊文岳以朱仙鎮之
敗亦免李自成陷歸德推官王世珍死之是月開封
圍久糧匱人相食周王恭柁捐百二十萬金復出食

祿以贍兵宮人咸有饑色九月甲戌命備十五騎于西華門候急傳乙亥命侍郎金之俊總理屯務辛巳以張國維爲兵部尚書己丑詔誅陳新甲于市周延儒入其賄力救之不聽竟棄市辛卯河決開封城陷周王恭枵及諸郡王走磁州文武吏卒各奔避士民溺死者數十萬人賊所駐地高獨得全水分流入于淮泗邳亳皆災副總兵黃得功敗賊于潛山之小市冬十月己亥張獻忠攻襄陽左良玉夜乘舟遁鄖陽撫治王永祚監軍僉事熊飛俱隨之戊申惠王常潤出奔偏沅巡撫陳睿謨以兵衛上章自列庚戌賜貧

民米布甲寅賊陷安慶丁巳以范景文爲工部尚書
戊午劉元斌監軍縱掠被劾並司禮王裕民以徇庇
洩旨俱伏誅乙丑增明年會試額六十人丙寅李自
成羅汝才復陷南陽屠之孫傳庭以兵敗上書自劾
詔圖功自贖十一月丁卯朔永城邑弁劉超與前御
史郭景琦忿爭殺之而叛庚午召見開封推官黃澍
問以河決事稱旨擢御史遣賫寸萬金往河南賑濟
左都御史劉宗周陳風紀六事曰建道揆貞法守崇
國體清伏奸懲官邪飭吏治而補陸謝薦巡方之積
習尤甚請以風憲受賊爲回道考察第一義帝深然

之壬申給事中陳燕翼奏汴城之難皆黃澍主議於
城北鑿渠通運謂引河水環濠旣得自固又可決隄
灌賊爲謀不臧致釀斯禍請正其罪帝不問我

大清發諸部兵由墻子路界嶺青山分道而入癸酉破
遷安三河甲戌駐永平之臺頭乙亥攻通州京師戒
嚴命勲臣分守九門以王承恩提督城守諭九卿科
道舉堪督師大將者丙子以徐石麒爲刑部尚書詐
定國以援河南縱掠兵潰下獄論死丁丑諭廷臣條
上措餉城守事宜戊寅募營軍家人運張灣通州倉
粟入京每石與直四斗己卯詔天下勤王我

大清兵入薊州張獻忠陷黃梅壬午我

大清兵分趨真定河間香河甲申周廷儒薦舊輔王應
熊自代詔趣召之命襄城伯李國禎選練官舍丁亥
詔劉澤清以山東兵入援中官盧九德防護鳳泗戊
子張獻忠陷無爲曹縣民婦生子兩頭頂有眼角手
過其膝閏十一月庚子發帑二十萬金市粟辛丑詔
曰比者災害頻仍干戈擾攘興思禍變宵旰靡寧皆
朕不德所致也自今日爲始朕敬于宮中默告上帝
修省戴罪視事務期却敵平寇以贖罪誓每日遵二
祖舊制勳戚文武諸司奏事者赴弘政門報名候召

壬寅我

大清兵攻河間分嚮臨清甲辰破霸州兵備僉事趙燁
同知丁師羲及州紳李時堯死之乙巳破文安戊申
破臨清戶部郎中陳興言總兵官劉源清及州紳張
宗衡等死之己酉李自成合諸賊圍汝寧城陷楊文
岳與兵備僉事王世琮被執俱大罵不屈死賊屠士
民數萬盡焚官私廬舍掠崇王由攢及世子妃嬪以
去我

大清兵破阜城知縣呂大成死之壬子破景州甲寅破
河間分守叅議趙瑛知府顏瑄紹知縣陳三接死之

戊午攻東昌劉澤清力禦之遂西攻冠縣李自成陷
荊州庚申帝因蜚語特旨戒飭言官有代人規卸爲
人出脫之語姜埰爭之謂此必有大奸巨慝惡言路
而思中之故以此激皇上之怒箝言官之口行人司
副熊開元面劾周廷儒于德政殿退而補疏謂廷儒
黷貨無饜營私廢公罪有擢髮難數者若不加體察
一時將吏狃于賄賂雖失地喪師皆恃以無恐誰復
爲皇上捐軀報國乎二疏入帝大怒並下詔獄辛酉
我

大清兵自臨清分五路攻東昌莘縣館陶高唐海豐癸

亥畧張秋甲子召廷臣于中左門問禦敵之策及督撫去留諸臣奏對畢劉宗周復請宥姜埰熊開元謂二臣即有應得之罪亦當付法司理問遽下詔獄恐有傷于國體帝曰三法司錦衣衛皆朝廷刑官何公私之與有宗周對曰掌衛刑者多膏粱子弟每聽寺人役使勢不容于不私也帝大怒曰如此偏黨豈堪憲職宗周謝罪諸臣各申救帝曰開元疏必有主使其即宗周矣僉都御史金光辰力爲奏辨帝怒不解退入煖閣傳旨宗周革職光辰降級調外用乙丑修撰魏藻德言兵事帝善之陳燕翼言兵餉缺乏由于

朝端無剛正之臣利口獲進重賂求薦陛下設廠衛
即因廠衛爲介紹託近侍即因近侍爲援引陛下籌
兵措餉不遺餘力豈知此輩平日所輦輸以得官者
皆陛下之兵所滿載而候代者即陛下之餉也陛下
深居法宮亦曾憬然悟此與左右大臣發憤改圖思
挽此積習否乎不報十二月丁卯我

大清兵自長垣趨曹濮別將抵青州入臨淄知縣文昌
時闔門死之戊辰破陽信知縣張子卿死之李自成
至樊城左良玉懼不敢戰拔營南走己巳自成陷襄
陽襄王常澄走免左良玉奔承天賊分兵陷彝陵宜

城荆門卒未我

大清兵破濱州。癸酉破兗州。兵備副使王維新。知州鄧藩錫。副總兵丁文明。郡紳范淑。秦等死之。是日我

大清分兵向泰安。東平。魚臺。武城。金鄉。諸州縣俱破之。甲戌。諭廷臣戴罪修省。鄭三俊。徐石麒各疏請寬。劉宗周不報我。

大清兵破沔陽。乙亥入沂州。又入豐縣。知縣劉光先死之。丙子。杖姜埰。熊開元于闕下。改刑部獄。丁丑。張獻忠陷太湖。知縣楊春芳。教諭沈鴻起等死之。戊寅。貢士祝淵請留劉宗周忤旨下獄我。

大清兵破蒙陰泗水鄒縣辛巳李自成至荊州士民迎
降丁亥左良玉避賊入武昌恣所部淫掠戊子以李
邦華爲左都御史己丑我

大清兵破滕縣知縣吳時良死之癸巳破贛榆甲午破
嶧縣乙未破郟城

十六年春正月丙申朔以邊警阻隔改會試于八月
殿試于九月詔各督撫圖功自贖李自成陷承天總
兵官錢中選戰歿巡撫宋一鶴巡按李振聲知府王
琰鍾祥知縣蕭漢留守沈壽崇等死之欽天監博士
楊永裕降于賊首勸進自成心喜始自稱倡義文武

大元帥設六政府官名襄陽爲襄京創宮殿以居荆
州承天德安汝南及夔陵澧州荆門漢川信陽禹州
鄭州俱分兵列守批約皆出永裕賊黨喻上猷薦江
陵貢士陳萬策李開先萬策自經開先觸墻死之丁
酉都給事中吳麟徵等疏救姜埰能開元不聽徐石
麒不俟庭訊竟具埰開元獄辭上之坐削籍復以胡
應台爲刑部尚書我

大清兵燔漕舟于黃河口己亥趨東昌乙巳賊陷雲夢
丙午陷孝感丁未黃陂士民殺僞令以守賊攻陷之
屠其城戊申賊陷景陵別賊陷德安丁巳張獻忠陷

蘄州令紳士俱冠帶出西門盡殺之江防副使許文岐被執不屈死之二月乙丑朔日有食之戊辰帝親祭社稷方及壇大風雨土五色炬盡滅諸中官幕黃布並劈紙障之僅成禮而還我

大清兵破武定庚午賊陷麻城壬申給事中熊汝霖劾失事巡撫九人語侵首輔延儒忤旨降福建按察照磨甲戌我

大清兵入萊陽知縣陳顯際及邑紳宋致趙士驥等死之庚辰左良玉避賊東下沿江縱掠至蕪湖南京大震競傳其叛熊明遇遣兵邀擊之斬千人始少戢癸

未李自成陷邳縣知縣李貞闔門死之戊子京師大
風霾夜西長安街石坊折天津城門自開庚寅左良
玉還池州壬辰我

大清兵至登萊合軍三月甲午朔暹羅入貢乙未吏部
以覲吏阻兵不前請俟四月朔大計報可賊陷常德
自是辰岳相繼俱陷雲貴道梗丁酉張獻忠陷蘄水
癸卯命吳姓兼兵部尚書督師平寇賜尚方劍給五
萬金備賞丙午我

大清兵破南宮丁未賊陷武岡州岷王企鰲遇害庚戌
我

大清兵入順德知府吉孔嘉死之丙辰趣各處覲官入
京以竣計典免直隸山東殘破州縣去年稅糧張獻
忠陷黃州副使樊維城死之尋陷羅田癸亥我

大清兵至易州夏四月甲子朔始大計天下羣吏戊辰
周延儒自請督師李國禎請以官舍銳士從征並報
可賜宴于武英殿而行癸酉命中官李國輔戒諭左
良玉良玉奏辦賜金幣以安之丙子暫停河工我

大清兵至琉璃河詔諸督撫合兵扼之辛巳戰于螺山
八鎮兵望旗而奔癸未趣王應熊入朝丙戌周延儒
偽奏捷張獻忠陷嘉魚署縣事教諭蕭頌聖死之五

月癸巳朔張獻忠陷漢陽臨江欲渡武昌大震楚王
自募承天潰卒以長史徐學顏領之號楚府兵甲午
召周延儒還朝李自成攻鄖陽兵備按察使高斗樞
屢出兵敗之賊多奔降自成怒築長圍困鄖乙未胡
應台病不赴召以張忻爲刑部尚書丙申詔延綏寧
夏甘肅諸監軍道並押鎮兵赴河南聽督撫調遣丁
酉賊陷保康知縣石惟壇死之己亥召保定巡撫徐
標入對標言自江淮至京數千里城破之處固蕩然
一空即有完城僅餘四壁蓬蒿滿路曾未遇一耕者
土地人民今已無幾陛下將何以爲治乎帝欷歔泣

下庚子馳賜周延儒鑿幣辛丑延儒報敵兵出塞溫
旨勞之科道俱劾延儒假道縱敵帝不問癸卯傅淑
訓張國維並罷以倪元璐爲戶部尚書馮元颺爲兵
部尚書永城叛卒出降馬士英合軍圍殲之俘劉超
至京伏誅賊益兵攻鄖陽高斗樞屢出兵敗之孫傳
庭遣高傑來援又敗之甲辰區別督撫功罪范志完
解任聽議趙光忤革職候勘呂大器孫晉王鰲永金
之後趙維岳李希沆俱議敘王永吉仍舊任王繼謨
史可法馮元颺俱聽察乙巳周延儒入道尋進太師
丙午鄭三俊以薦引非人坐免未幾下都察院議罪

以李遇知爲吏部尚書丁未進修撰魏藻德爲禮部
侍郎兼東閣大學士入閣辦事藻德辭侍郎改少詹
事宴入援總兵官吳三桂劉澤清馬科等于武英殿
戊申吳姓遷延未行詔趣入直姓引罪得旨致仕辛
亥以中官王之俊提督京城巡捕練兵癸丑命福恭
王庶長子由崧嗣爲王丙辰給事中王都勅周延儒
狡詐欺君喪師辱國丁巳勒延儒致仕庚申閱京營
兵械于觀德殿壬戌張獻忠攻武昌楚府兵應之城
陷沉楚王華奎于江賀逢聖徐學顏及總兵官崔文
榮死之蒲圻嘉魚皆降賊據楚府僞稱西王設五府

六部名武昌爲京城大殺掠沿江浮屍千里六月戊辰召李遇知馮元飈隆平侯張拱祿及戶部司務蔣臣于中左門以臣建議行鈔也給事中馬嘉植爭之不聽乙亥詔直省殘破州縣自十六年始免三餉及一切常賦兩年丁丑懸購賊賞格得李自成者萬金爵通侯世襲得張獻忠者五千金官極品仍世錦衣指揮使庚辰左良玉還九江仍縱兵大掠應天巡按鄭崑貞言根本重地諸臣日有條陳陛下日有嚴飭然對君父則曰事事皆備相告語則曰無可奈何今剝膚之痛已在武昌樞臣熊明遇議論虛恢全無實

著操臣顧聲迹采石本其汎地未嘗一至一旦順流
直下誰爲扞蔽者報聞己卯武德道僉事雷續祚劾
范志完淫掠及輦金行賄諸事遣緹騎逮之以中官
車大任提督南京織造乙酉雷震奉天殿左獸吻流
火鎔插劍銅環遣官告太廟諭百僚修省詔左良玉
勦張獻忠于蘄黃辛卯前文選郎中吳昌時以貪險
不法逮下獄候鞠秋七月逮薊督趙光忭與范志完
並下法司論罪甲辰加孫傳庭爲督師兵部尚書兼
制應鳳江楚豫川軍務呂大器爲兵部侍郎總督江
楚應安軍務辛亥以張國維秉樞不職侯恂棄關封

不守逮之總兵官方國安敗賊于大冶乙卯帝親鞠
吳昌時于中左門榜掠至折脛詞連御史蔣拱宸等
逮下獄並徵周延儒聽勘丁巳議卹故總督盧象昇
並覈死事文武諸臣己未戒廷臣私謁內侍有事則
於直廬商之庚申京師大疫自二月迄于是月死七
日以千計詔盡釋輕繫發內帑千金資太醫院醫療
又二萬金五城收瘞召張應京建醮禳之不止日晡
驚傳鬼出民間夜擊銅鐵器以驅厲崇聲達大內不
能禁八月壬戌朔左良玉遣兵復武昌漢陽丙寅張
獻忠陷岳州又陷臨湘知縣林不息死之辛未詔兵

部彙上文武大臣科道舉堪督撫總副者並入覲官
所薦將才左副都御史惠世揚以輕處鄭三俊削籍
裁操江都御史專以誠意伯劉孔昭領其事給三萬
金治舟械甲戌孫傳庭大兵次闕鄉乙亥中官王承
恩督察京營戎政丙子出二萬金市馬丙戌張獻忠
陷長沙巡撫王聚奎先期遁推官蔡道憲被執不屈
死之總兵尹先民等降庚寅獻忠陷衡州桂王常瀛
及惠王常潤吉王 走永州九月壬辰朔黃景昉
予告歸丙申張獻忠陷寶慶己亥孫傳庭次汝州賊
將李養純降辛丑復寶豐擒賊將陳可新壬寅自朱

仙鎮南征大雨六日糧車不至軍饑甲辰復邠縣集
邑中騾羊二百餘頭食之頃刻而盡己酉詔河北山
西就近餉之丙午策試天下貢士賜楊廷鑑等四百
人進士及第出身有差庚戌張獻忠追桂王于永州
湖廣巡按劉熙祚被執不屈死之甲寅作新鈔孫傳
庭兵潰于襄城以餘衆四萬入潼關冬十月辛酉朔
副總兵沈萬登復汝寧斬賊將馬尚志等以捷聞壬
戌賊陷閩鄉癸亥徐州副總兵金聲桓討蕭礪諸盜
平之李自成間道出潼關後夾攻官軍大潰總督孫
傳庭死之甲子自成連陷華州渭南渭南知縣楊暄

死之乙丑陷臨潼我

大清兵屯山海關外總督王永吉趨備關門詔發帑十
八萬金資餉賊張其在陷萍鄉插嶺分掠萍鄉醴陵
境上檄縣令造舟獻馬于是袁瑞臨江之人俱空丙
寅諭有司贖鍰除積穀及額外俱充餉是夕李自成
攻西安戊辰屠商州商雒道黃世清死之關中瓦解
詔加白廣恩盪寇將軍庚午削孫傳庭尚書以爲事
官克秦督扼守潼關未知其敗沒也張獻忠陷常德
別遣二百餘人趨連州南贛兵備副使王孫蘭駐韶
州聞之自經樂昌乳源仁化悉自潰韶州吏民皆絕

而逃城空辛未張獻忠屯袁州張家口張其在自萬
載往會之郡人迎降左良玉遣副總兵吳學禮援袁
州圍其城癸酉學禮所部都司高山先登斬賊將丘
仰寰復袁州西安陷巡撫馮師孔及按察使黃綱知
縣吳從義長史章世綱指揮崔爾達郡紳焦源溥祝
萬齡陶爾德寶光儀劉芳聲等死之自成據秦府以
秦王存樞爲權將軍永壽王誼沅爲制將軍分賊下
所屬州縣甲戌授進士陳丹衷御史偕副總兵成大
用資金幣發廣西土司兵丙子閱勛臣武臣子弟騎
射丁丑張其在陷吉安戊寅詔禁奢侈止宴樂金銀

器關典禮者留之餘悉克軍功賞賚帝親御浣衣錫
木器以先天下戒諸臣一體永遵辛巳鳳陽地震
癸未李自成分兵畧鄜延中部知縣朱華堞闔門死
之乙酉王應熊至請老許之戊子禮部尚書林欲楫
致仕庚寅馮元飈僞疾求退許之超擢張縉彥爲兵
部尚書以余應桂爲兵部侍郎總督陝西三邊軍務
應桂超起河上不進十一月辛卯朔諭臣民助餉立
功者錄之壬辰呂大器復吉安癸巳張獻忠再陷岳
州武昌大震甲子李自成陷延安尋屠鳳翔己亥詔
左良玉移鎮武昌良玉以副總兵張應元吳學禮守

九江自率舟師入武昌甲辰良玉遣兵復萍鄉命中
官何志孔勞之進少師廕一子錦衣賜蟒衣牛酒將
吏各進秩有差高傑率所部奔絳州山西巡撫蔡懋
德招之擊賊傑乃破王老虎追至曲沃降之李自成
發金數萬招榆林諸將遣李過以大兵隨之兵備副
使都任與前總兵官王世顯侯世祿侯拱極尤世威
副總兵惠顯李昌齡尤翟文等歛各堡精兵入鎮城
推世威主兵敵盟死守賊多方說降不聽力攻之城
上叢射賊屍山積丙午自成兵攻寧夏守將分營逆
戰三勝之庚戌瑞王常浩自漢中走廣元辛亥命吏

部侍郎李建泰左副都御史方岳貢並兼東閣大學士入閣辦事癸丑戌吳姓于金齒衛出南京諸監局廢銅鑄錢甲寅副總兵馬士秀復岳州丁巳賊攻榆林城陷都任尤世威等率兵巷戰死之圍城無一降者婦女皆自盡榆林天下勁兵之處自此及寧夏既沒賊無後顧遂長驅而東庚申李自成陷慶陽韓王亶睿被執兵備副使段復興知府董琬郡紳麻禧俱死之賊屠其城十二月壬戌張獻忠陷建昌乙丑周延儒有罪賜死其日范志完趙光忭及吳昌時俱僇于市丁卯張獻忠陷撫州壬申李自成至三原癸亥

至富平大掠乙亥西域獻千里馬丙子李自成兵掠
韓城丁丑詔楚撫何騰蛟會承天鄖陽二撫臣恢復
承天荆襄呂大器同左良玉平張獻忠黔廣總督李
若星沈猶龍提兵夾擊戊寅蔡懋德屯平陽以歲暮
暫還太原令裨將牛勇朱孔訓扼河爲守李自成聞
之即日勒兵東渡勇孔訓兵敗死之庚辰帝以宣府
爲京師之蔽發御前銀三萬給總兵官唐鈺市馬蔣
德璟以馬價歲有常供爭之不聽壬午李自成陷平
陽吏民皆降西河王 等三百人遇害又陷稷山
河津其日張獻忠自岳州渡江與馬守應合癸未高

傑聞平陽陷自蒲州恣掠趨澤州李自成傳檄山西
郡縣文武各官務獻城納印以圖自全甲申自成遣
兵陷甘州巡撫林日瑞總兵官馬爌副總兵郭天吉
及衛紳羅俊傑等並死之東陽知縣姚孫渠貪虐諸
生許都因衆怒執而撻之遂叛丙戌左良玉遣兵復
長沙及湘潭湘陰丁亥馬進忠禦獻忠于蒲圻敗績
己丑許都陷浦江官兵乘除夕攻破之賊潰都走山

中

十七年春正月庚寅朔大風霾鳳陽地震壬辰諭兵
部募廢弁及草澤義勇之士高傑潰兵破清化鎮城

渡河駐懷慶癸巳倪元璐請練鄉勇于浙江報可乙未授貢士何剛職方主事往東陽義烏練兵剛陳取人用將行兵三策下部議行丁酉浙江巡按左光先遣人招諭許都都率同叛十三人詣杭投獄光先立斬之戊戌詔京師講鄉約朔望宣聖祖六諭仍記善惡二冊以俟勸懲高傑南下江北大震漕督路振飛命副總兵金聲桓等扼徐泗清口以備之庚子李自成遣人投偽牒約戰斬之帝以李賊勢大臨朝愁歎李建泰奏臣家山西請措餉百萬治兵勦寇不使東渡時賊已渡河山西郡縣多陷督撫畏罪不以聞建

秦猶未之知也。帝解頰曰：「卿若肯行，朕當倣古推轂之禮。」甲申，釋熊開元于獄。李自成大賚其僞臣，以秦王存樞、永壽王誼流，韓王亶、恭慶王倬、淮東行後四月中敗，還盡殺諸途。乙巳，張獻忠步騎數十萬自荊州向夔州。丙午，賊陷洪洞，徧括官室銀助餉。丁未，沔陽知州章曠之官以鄉勇三千人擊賊于景陵，敗績。戊申，吏部以秦賊窺渡三晉，披靡請復保督修戰守之備，從之。己酉，賊陷聞喜。壬子，詔河南按察使會同撫按掘汴城水滄，遺賫賊。至趙城，副總兵陳尚智迎降，導而破之。自是賊所至多開門出迎。癸丑，進陳演

少保吏部尚書詔馬士英偕中官盧九德協勦張獻忠乙卯南京地震遣官告太廟行遣將禮賜李建泰敕曰咨爾建泰朕親征以尚方劍從事一切調度賞罰俱不中制帝臨軒授之以進士凌駟爲職方主事監其軍隨幸正陽門樓躬餞文武大臣皆侍坐樂作帝手卮酒賜之曰如朕親行建泰頓首謝酒罷即行帝目送之泣數行下是日大風霾帝與羣臣倚雉堞西望塵埃漲天神色皆沮喪丙辰建泰出都後即傳晉警初意傾家貲享士或可濟難及聞變失措因徐行日三十里至涿州兵逃者已三千餘人以范景

文及禮部侍郎丘瑜並兼東閣大學士入閣辦事回
回貢玉大者重三百五十斤張縉彥以寇未渡河捷
監軍訶報者帝亦聞賊尚未東給事中韓如愈復上
言晉寇訛傳遂責兵部輕信時賊謀徧布京師給事
中高翔漢秦人夙通賊賄以兵科日于會極門候軍
機章奏舉朝所不及知悉以報賊而賊之動靜上下
皆懵然也丁巳張國維逮至京倪元璐李邦華俱薦
之詔以原銜督浙直轉餉練兵國維奏輸納事例下
部行之戊午李建泰至廣宗城守不納攻三日破之
殺邑紳王佐答知縣張洪基己未左良玉至武昌二

月庚申朔早朝忽得偽封啓之其詞甚悖末云限三
月望日至順天會同館繳帝與羣臣相顧失色馬進
忠復長沙李自成陷蒲州附近諸縣皆降河北大震
濟源諸縣人盡竄懷慶城門晝閉辛酉李自成陷汾
州知府侯君招知縣劉必達等死之又陷懷慶福王
由崧奔衛輝依潞王常洵與太妃相失壬戌戊姜埰
于宣城甲子張忻條上納銀贖死罪劄乙丑賊圍太
原傳檄遠近有云君非甚闇孤立而場蔽恒多臣盡
行私比黨而公忠絕少甚至賄通官府朝廷之威福
日移利入戚紳間左之脂膏盡竭又云公侯皆食肉

統袴而倚爲腹心宦官悉齧糠犬豚而借其耳目獄
囚纍纍士無報禮之心征斂重重民有偕亡之恨丁
卯大風霾五色遞變閭室照之赤如血太原陷晉王
求桂被執巡撫蔡懋德布政使趙建極兵備副使毛
文炳按察僉事畢拱辰等死之卒未召戶兵二部科
及總兵官吳襄于中左門問襄以用遼兵之計詔以
郡縣民壯編入鄉兵實行訓練李自成陷黎城其別
部陷臨晉壬申帝憂寇頒詔罪己畧曰災害頻仍寇
盜日熾生民荼毒靡有寧居坐令秦豫坵墟江楚腥
穢罪非朕躬誰任其責所以使民罹鋒鏑蹈水火殲

量以壑骸積成丘皆朕之罪也飛芻輓粟居送行賈
加賦多無藝之征豫徵有稱貸之苦又朕之罪也室
如懸磬田卒汙萊望烟火而無門號冷風而絕命又
朕之罪也至于任大臣而不法用小臣而不廉言官
首鼠而議不清武將驕懦而功不舉皆朕撫馭無術
誠感未孚中夜以思跼蹐無地冷痛加創艾深省愆
尤要在惜人才以培元氣守舊制以息紛囂行不忍
之政以收人心蠲額外之科以養民力念用兵徵餉
原非得已各省直撫按官急飭有司倘擅加耗羨朦
混私徵及濫罰淫刑成正厥罪其流亡來歸悉蠲逋

賦加意收卹使得自存至于罪廢諸臣果有公忠正
直廉潔強幹者不拘文武吏兵二部確核推用草澤
豪傑之士有能恢復郡邑便與世襲同開國功即陷
沒脅從之流能舍逆歸正擒斬闖獻仍予通侯之賞
癸酉李自成陷潞安甲戌李自成前鋒至大安驛張
縉彥請令李建泰綢繆布置臨德通津昌平密雲六
鎮並聽調遣時建泰在河間遷延不進兵過東光不
戰士民閉城拒之建泰怒又留攻三日破之乙亥議
京師城守命勸貸文武諸臣戶部上文武納銀貲封
事例太康伯張國紀助餉萬金進爲侯李自成至忻

州官民迎降遂攻代州總兵官周遇吉出兵奮擊食
盡退守寧武關丁丑賊抵固關分趨真定保定帝始
聞山西盡陷命跡訪諸王所在庚辰遣高起潛總監
關薊寧遠盧維寧總監臨德通津方正化總監真定
保定杜勳總監宣府王夢弼監視順德彰德閻思印
監視大名廣平牛文炳監視衛輝懷慶楊茂林監視
大同李宗允監視薊鎮中協張澤民監視西協諸邊
要害盡以中官監之兵部言各處物力不給而事權
紛拏徒使督撫借口請俱罷遣弗聽辛巳遣王坤督
兩淮鹽課通州兵課傷巡撫楊鶚鶚自劾乞罷不許

壬午蠲開封歸德河南田租三年真定知府丘茂華
與督標中軍共殺總督侍郎徐標檄所屬降賊越數
日賊兵始至甲申命張縉彥兼翰林院學士賊至彰
德趙王常洵降乙酉倪元璐解戶部尚書還詹事府
仍專司日講丁亥詔天下兵勤王命廷臣條上戰守
事宜左都御史李邦華少詹事項煜右庶子李明睿
並言南遷及東宮監撫南京帝驟覽之怒甚曰諸臣
所言謂何少間色漸平心念寇深言或可採也已竟
中寢都給事中吳麟徵請棄關外寧遠前屯三城徙
吳三桂入關令屯近郊宜可倚以辦賊諸臣皆以棄

地非策不敢任張獻忠陷夔州戊子陳演乞休許之
擢吳履中爲戶部左侍郎署部事寧武關陷周遇吉
闔門死之賊屠寧武嬰穉不遺別部陷大同代王傳
燧闔宗遇害巡撫衛景瑗分巡道朱家仕督糧郎中
徐有聲總兵官朱三樂等死之帝召張縉彥于中左
門問以真定陷徐標遇害之狀對曰不聞帝曰宮中
皆知之卿尙諱也曰臣未見塘報帝曰城已破誰爲
報者卿爲大司馬乃不設遠偵耶曰遣偵必給工食
臣部無一緡安得偵騎帝怒推案而起三月己丑朔
召張國維及庶吉士史可程進士朱長治陳州諸生

張鐸于中左門鐸請皇太子監國南京擇大臣輔之
遂命張國維並遵旨南發命部院廠衛司捕各官讞
察奸宄申嚴保甲巷設邏卒禁夜行謹視倉庫草場
庚寅召文武大臣及科道于中極殿問目前方畧奏
對可三十餘人皆無可採命中官會同勲臣及卿貳
諸臣分守九門稽出入每門中官一人勲臣一人卿
貳二人以李國楨提督其事辛卯李建泰自軍中奏
請南遷願奉皇太子先行壬辰召廷臣于平臺示以
建泰所奏曰國君死社稷朕將安往耶范景文及李
邦華項煜俱言太子撫軍江南於計實便給事中光

時亨曰奉太子往南諸臣意欲何爲班行默然帝歎
曰朕非亡國之君諸臣皆亡國之臣也遂拂袖入欽
天監奏帝星下移詔羣臣修省蔣德璟乞休許之癸
巳封吳三桂爲平西伯左良玉寧南伯薊鎮總兵官
唐通定西伯鳳廬總兵官黃得功靖南伯各給敕印
潞王常淂福王由崧周王恭枵崇世子慈煥俱南奔
李建泰之兵潰于保定建泰被執監軍金毓峒及郡
紳張羅彥等不屈俱死之丁酉始棄寧遠徵王永吉
吳三桂兵入衛並唐通劉澤清召之澤清方奉移鎮
彰德之命因縱掠臨清南奔戊戌遣中官謝文舉監

視山西李自成次陽和兵備僉事于重華郊迎遂長
驅向宣府癸卯復頒罪己詔于天下畧曰朕承天御
宇十有七年任用非人徵輸日益以致賊勢滋蔓脅
從愈多豫楚秦晉盡遭殘殺貲財被其席卷妻子恣
其奸淫田園受其汙萊居室遭其焚燬爾民忍怨吞
聲無所控訴朕心痛憾寢食不安已調各路兵水陸
並進上雪國恥下復民仇今與爾民約勦餉已經蠲
免召買悉行停止郡縣有私徵私派濫罰濫刑朕不
時密訪立正其罪大小將士戰守有功即與陞賞官
民男婦殉義死節優加贈卹一切不便于民之事咸

永除之與天下更始無信流言自爲驚擾乙未遣中
官馬思理赴大同督兵援勦唐通以八千人入衛召
見慰勞賜蟒衣金幣更以四千金犒軍帝按諸勲臣
戚臣及中官籍責其助餉百官共議助以省爲額先
後合二十萬又議前三門富室輸糧贍軍諸富室皆
不樂而罷丙申大風霾晝晦風腥不可觸諭勲戚文
武諸臣進馬命唐通與中官杜之秩守居庸關賊至
宣府叛將白廣恩以書約降杜勲緋衣八駟出迎于
郊巡撫朱之馮暨武舉金振孫俱死之丁酉召王鐸
爲禮部尚書擢陳必謙工部尚書戊戌命王承恩提

督京城內外防守王永吉節制各鎮俱聽便宜行事
庚子賊前鋒抵近郊中外大震帝日召廷臣問方畧
輒泣下廷臣進計惟閉門止出入他無一籌李國楨
雖提督城守不敢與王承恩抗給事中戴明說糾之
國楨益沮喪辛丑孝陵夜哭壬寅派曹化淳等守城
癸卯大風晝晦命三大營兵屯齊化門外賊自柳溝
抵居庸關唐通杜之秩迎降甲辰賊陷昌平焚十二
陵總兵官李守錄力戰不勝死之帝方召考選知縣
黃國琦等三十三人于中左門問以勦寇生財用人
之計國琦對稱旨即授兵科給事中餘以次對未及

半忽秘封入則昌平之報也帝覽之色變即起入諸
臣立候移時得旨乃出開西直門納難民中官坐城
上主之諸勲臣大臣皆不能語吳三桂奉旨入衛徒
二十萬衆行日數十里是日始抵關王永吉倉皇出
關依之乙巳蚤朝召對諸臣泣諸臣皆束手無策相
向泣不能對或有言馮銓楊維垣當用有言劉澤清
當對伯帝不應書御案十二字示王之心旋拭去之
已刻賊哨騎至城下守臣中官使騎候之曰非賊也
不爲意亭午有五六十騎彎弓挾矢大呼門門守卒
亟發砲斃二十騎須臾賊大至攻平則彰義門城外

三大營兵潰降火車巨礮皆爲賊有賊舉礮攻城轟
聲震地李國楨馳闕下求面對中官叱止之國楨曰
今何時尚作此態君臣即求相見不多得矣乃引入
見帝哭訴曰守城兵不用命鞭一人起一人復卧軍
皆解體矣奈何帝命如己巳例中官數千人皆乘城
又括中外銀二十萬犒軍諸奄既列城上文臣分守
者俱不得登李邦華至正陽門欲上奄拒却之張縉
彥歷抵各城欲核城上守禦亦爲所沮時各城守卒
寥寥城下穴墻聲甚急諸奄皆飲酒自若縉彥馳至
內閣約同上奏至宮門奄復傳旨止之丙午大雷電

雨雹賊攻城礮聲不絕仰語守兵曰亟開門否且盡
慘矣守者懼以空礮外嚮揮手使引避乃發之賊驅
民負木石平濠架飛梯急攻又發萬人敵大砲傷數
十人守卒皆潰李自成向彰義門設座使杜勳呼城
上人可縋一人下欲有所言守者曰請質以縋公入
何如勳曰我無所畏何質為王承恩縋之上共入見
帝盛稱賊勢皇上當自為計守陵中官申芝秀自昌
平降亦縋城入見述賊語請帝遜位帝怒叱之諸奄
欲留勳勳不可復與芝秀縋而下勳顧其黨王相堯
諸憲輩曰我輩富貴自在也帝手書親征詔召鞏永

固令以家丁護太子南行對曰臣等安敢私蓄家丁
即有之何足當賊已召王承恩整內員候親征申刻
曹化淳啓彰義門迎賊入守城勦衛盡遁光時亨迎
降帝亟召輔臣入曰卿等知外城破乎曰不知也帝
曰事急矣今出何策皆曰皇上之福自當無慮如其
不利臣等率兵巷戰誓不負國及夜王相堯領內兵
千人啓宣武門迎賊內城亦陷有奔告者帝問大營
兵安在李國楨安往對曰大營兵散矣皇上宜急走
其人遽去呼之不應帝遂同王之心幸南宮登萬歲
山望烽火燭天徘徊久之回乾清宮朱書諭內閣命

成國公朱純臣提督內外諸軍事夾輔東宮付中宮
持至閣輔臣未有至者委案上而去帝召周后袁妃
太子二主至謂后曰大事去矣爾爲天下母當死后
慟哭受命帝呼酒訣別連進卅數卮歎曰所痛者我
闔城百姓耳親爲太子二王易敝衣分送外戚周氏
田氏后拊太子二王復慟哭良久遣出乃還宮自縊
帝起入中宮拔劍撞其懸而轉之知己絕去入壽寧
宮長平公主年十五方伏哭帝曰汝何爲生我家左
袖掩面右手揮刃斷其左臂未殊手慄而止又劍斫
昭仁公主于昭仁殿年始六歲其他所御妃嬪爲帝

所刃者復數人惟袁妃自經繫絕久之乃蘇帝微服
出自中南門手三眼鎗雜中官數十人皆騎而持斧
欲奪正陽門出守者疑內變施矢石相向時朱純臣
守齊化門轉趨其第閹人辭焉去之安定門門堅不
可啓天且曙仍回南宮登萬歲山崩于壽皇亭亭新
成帝所閱內操處也王之心縊于繩尾從焉其御書
衣襟曰朕涼德藐躬上千天咎致逆賊直逼京師皆
諸臣誤朕朕死無面目見祖宗自去冠冕以髮覆面
任賊分裂毋傷百姓一人是日辰刻九門俱陷賊黨
劉宗敏統賊入大學士范景文戎政侍郎王家彥河

南道御史王章死之太子奔周奎家奎卧未起不得入走匿侍奄外舍午刻李自成由德勝門轉至大明門羣賊牛金星宋企郊喻上猷黎志陞張嶙然從之杜之秩等前導入宮賊分宮嬪各三十人見袁妃公主創甚令扶去中官尚衣者乃負公主付周奎明日戶部尚書倪元璐左都御史李邦華刑部侍郎孟兆祥及其子進士章明左副都御史施邦燿大理卿凌義渠左庶子周鳳翔左諭德馬世奇左中允劉理順簡討汪偉太常少卿吳麟徵太僕丞申佳瑞都給事中吳甘來四川道御史陳良謨考功員外郎許直武

庫郎中成德車駕主事金鉉中書宋天顯阮文貴經
歷張應選署丞于騰蛟新樂侯劉文炳及其弟文耀
惠安伯張慶臻宣城伯衛時春駙馬都尉鞏永固指
揮姚成王國興李若連高文采俱死之中官獻皇太
子賊令送宗敏所又擁定王永王至留之西宮庚戌
始移帝后喪置東華門外武選主事劉養貞市柳棺
殯之慟哭三日夜不去羣臣臨者止二三十人賊至
內閣見所諭朱純臣帖收純臣及弟姪皆殺之辛亥
以梓宮改殯帝后帝丹漆后黝漆賊黨牛金星令朝
臣進謁入選者候會極門下餘出東華西華二門東

出者仍拘各營西出者悉斬之凡七十六人皆勲戚也李國楨與焉丙辰吳三桂聞京師陷帝后殉難遂出關降于我

大清且乞師我

大清命將討賊即以三桂兵爲前鋒賊遷帝后殯于昌平昌平平士民啓田貴妃幽宮奉帝后合葬辛酉賊焚太廟以太祖主入歷代帝王廟大雷電震死執役數人夏四月戊辰我

大清兵敗賊于永平西沙河驛都人聞之其夜張檄城外約縞素復仇士民俱裂帛以待癸酉賊發宮中積

金十餘窖皆累朝所藏也諸奄不以上聞相習竊盜凡三千七百萬有奇至是盡載以入秦丙子李自成兵敗于山海關己亥又敗于永平自成奔還京師令劉宗敏等合十八營拒戰又大敗丁亥自成盡焚諸宮殿及九門門樓以其衆西走己丑我

大清兵追賊至保定復大破之庚寅我

大清兵入京設帝神主于帝王廟令臣民發喪成服哭臨三日謚曰欽天守道敏毅敦儉弘文襄武體仁致孝莊烈愍皇帝陵曰思陵

論曰治亂興亡之故雖曰人事豈非天命哉明代至

光熹而後威柄下移法紀漸滅嗚呼此國運告終之
候也帝不幸適身當其厄十有七載汲汲皇皇何嘗
不時厯宵旰而天命既去民心日離物怪人妖留害
並至雖有善者亦莫如之何也已帝又卞急性生重
以猜愎乖張鏗刻動見紛拏嗚呼是揚湯而止沸抱
薪以救火也曾何益之有哉矧其時生靈塗炭鋒鏑
滿于天下士大夫猶闕堂闔室獄訟弗休不知有宗
社何有于封疆耶帝固曰諸臣盡敗亡之徒耳反而
求之不知將自居于何等也天實絕我未亡奚待嗚
呼尚何言哉尚何言哉